

Udako Euskal Unibertsitateko ikastaroak Iruñean

Giro beroa UEUn, izugarri beroa

Iruñeko ikastaroetako egun arrunt bat zelakoa den kontatu digute hainbat ikasle, irakasle eta partaidek

R. OLASAGASTI / IRUÑEA

Berrogeita lau gradu Iruñean, ez da giro. Praka motz, tiradun niki, soineko fresko eta sandalien erreinua da Larraona ikastetxea. Eskerrak behintzat kolore anitzetakoak diren, Udako Euskal Unibertsitateko (UEU) uniforme ofiziala ote den-edo pentsatzen hasiak bakara. Goizeko lehen atsedendaldirako ailegatu gara, 11.15ak aldean. Pasiloetan ere beroa dabil hitzetik hortzera, «sekula horrelakorik!». Atsedendaldian tabernara inguratu eta bart gaueko kontuekin ari da bat eta beste: 'Halakorekin topatu ginen Alde Zaharrean'; 'Hitzerdi taldearen antzezlanaren ere ez zen txarto egon'...

Sarreran ikusi ditugu lehen-dabizi eta pasiloetan ere ez dute bakerik ematen. Noski, ez dira alferrik kazetarigaiak. Kamera gora eta kamera behera, aurpegi ezagun ororen ehizan dabilta Kazetaritza ikastaroak. Halako batean, hortxe harrapatu dute Luis Fernandez gure kidea ere —famaren ordaina Luis!—, itaun batzuk egiteko. Guk ere abagunea galdu gabe euren berri jakin nahi izan dugu. Saioa, Iratxe eta Leire Kazetaritza eta Soziologiako bigarren mailan ari dira Leioan. «Oso gustura gabilta UEUn. Lagun asko topatu ditugu, eta beste berri asko egin ere bai; alde horretatik oso aberasgarriak dira ikastaroak». Dena dela, jendearen arteko giroa, antolatutako gabeko ekitaldietan sortzen den hori, faltan sumatzen dute hiru neskek.

Sarrerako eskailaretan mundua konpontzen ari dira Aitor eta Rafa. Guk, lotsagabe-lotsagabe, grabagailua jarri diegu parean. Portugaletakoa da bat eta Basaurikoa bestea, Glotodidaktikako ikasleak biak. «Aurreneko aldia dugu UEUn eta harrituta geratu gara giroarekin, Euskal Unibertsitatea horrelakoa balitz, bi hilabeteko 200.000 pezeta or-

■ UEUko udako ikastaroen inguruko hainbat kontu egiak direla frogatzeko aukera izan genuen aurreko batean: gaztelaraz eta frantzesez ez dela hitz bakar bat ere entzuten, hainbat herritako jende anitzek elkar ezagutzen dutela, giroa jatorra dela oso, ligatu ligatzen dela (?)... UEUko egun arrunt baten kronika besterik ez da honakoa. ■



Egunbeteko eskolen ondoren gauetan dantzarako astia ere izaten da.

E. ASTIGARRAGA

daindu eta gustura asko emango genukeen izena».

BI BILAR BAKARTI Poliki-poliki klaseetara itzultzen doaz 'artaldetxoak'. Pasilo nagusian bi bilar bakartiak geratu dira. A! eta praktikan ari diren kameradunak. Hiart Sakana-koa eta Daniel Legasakoa Opu-sean dabilta kazetaritza ikasten. Esan beharrik ez dago, Opu-seko giroa eta UEUkoa gaua eta eguna bezala direla eurentzat. «Klaseak, berriz, lagunartekoak diren arren, urte guztian baino gehiago ikasi dugu hiru egunotan».

Konturatzerako iritsi da bazkalordua. Idazkaritzan txarteltxoak eskuratu eta jangelako ilarran jarri gara-gu ere. Orain goizeko hitzaldien interesgarritasuna gora-behera sumatzen da jendea berbetan. Marmitakoa,

Altonaga: «Hemendik aurrera kamioiaren atzean ere pozik»

● Kepa Altonaga UEUko zuzendaria kargua uztara doa aurrean, eta boss-ari enegarren hitza ateratzen dio: «Juan Carlos Peréz-en 'Atlantic River' diskoko urte biltzailearen kantuak dioten bezala, kamioiaren atzealdean ere pozik egongo naiz ni; orain arte aurrean izan naiz, baina atzean ere pozik». Euskal Unibertsitatea «2000. urtetik aurrera» gauzatuko dela dio txartelak.

Iturriotz: «Gazteen artean inplikazio bera sumatu dut»

● Sei urte badaramatza Ander Iturriotz EHUko irakasleak UEUra etortzen, irakasle moduan. «Zerbait aipatzeko-tan, irakasle gehiago etorri da, irakasle arteko mintegia antolatu dugulako besteak beste. Gazteen artean inplikazio bera sumatu dut, galderak egiterako orduan eta».

Arraiz: «Gero eta jende gazteagoa ikusten dut»

● Eugenio Arraizak azken 15 urteotan begi-bistako aldaketa besterik ez du sumatu: «Gero eta gazteagoa da jendea nire aldean». Bestelakoan, ikastaro gehiago eta maila hobekoak, irakasle eta ikasle prestatuagoak daudela iritzi dio. «Lehen euskaraz trebatzen zuten jendea eta egun maila hori gaintu dugu behintzat».

solomua patatarekin eta yogurra; beroa aplakatzeko to kategoria gaitasuna! Lepo bete da jantokia. Mahaietako batean, Iñaki Barrena, Mario Zubiaga, Ander Iturriotz, Patxi Juaristi, Mikel Zurbano, Txoli Mateos, Xabier Aierdi eta beste zenbait goizean mintzagai izan duten 'Nazionalismo, postnazionalismo eta supranazionalismoa' gaiaren gainean aritu bide dira, benetako mahainguruan oraingoan. Ez da enbarazu egiteko ordua.

IRAKASLEAK MUNDUA KONPONTZEN

Behin kafetegian, ordea, are biziagoa sumatu dugu eztabaida. Kafe eta patxaranak hauspotua seguruenik. Artikulua irakasle jantzion iritzi jantziarekin jantzeko hurbildu, eta «planteamendu okerrari» buruz hizketan harrapatu

ditugu: «Goizeko berbaldian 9.000 aldiz aipatu dugu Herrero de Miñonen artikulua bat, kristo guztiak irakurria izango zuelakoan baina...». Baina ez, eta ikasle harridura aurpegiak berandu ohartu dira antza. Guk ere, grabagailuak traba itzela egiten duela konturatu eta hanka egin dugu. Nazio askapenerako giltzarri bila geratu dira.

Siestako orduan, euskaldunen ohitura sano hau ez dela guztiz galdu egiaztatu dugu. Bien bitartean, sutan daude prentsa bulegoko Macintoshak, Nerea, Arantxa, Koldo, Iñaki eta besteek ematen dieten tratua ez baita gozoa. Ordenadore gaixoez ez dute ulertzen, ordea, 'Udaro-k' —UEUko berripapera— zintzo-zintzo Larraonan egon behar duela hurrengo goizean. Horrez gain, hedabideei egunerokoaren berri ere eman behar diete, eta, beraz, atsedendaldirako eskasak dira tarteak.

Arratsaldeko eskolak hasi aurretik, bart nahiko lo egin duen bat edo beste jaitzi da bilarrean jokatzen. Aitor eta Igor errotarrak adibidez. Aitor Historiako ikastaroa ari da egiten eta Igor Kazetaritzakoa. Giro ona nabaritzen badute ere, Aitorrek «hobeak» ezagutu dituela esan digu. «Labayrun ere egona naiz, eta han, jende gutxiago geundelako-edo, komunikazio handiagoa zegoela iruditzen zait».

Afalostean Mikel Elizaga nafarrak kantatuko du eta ordu txikiak behintzat aise harrapatuko ditu gauak. Bihartik, bigarren astearekin batera, jendeak hobeto ezagutuko du elkar. Garesko festak hasiko dira, UEUkideak Iruñea la nuit-en jabe egingo dira, eta orduan, beharbada, Iparraldeko neska ponpoxa harekin ligatzea lortuko duzu, edo bizkaitar lerden haren 'agur' hutsarekin mela-mela eginda geratuko zara. Orduan hasi bide dira benetako ligeak, gaur, arrastorik ere ez baitugu sumatu aizue!



Bazkalostea ordu aproposa izaten da lasaitasunerako. OSKAR MONTERO



Kazetaritzako maisuak ere animatzen dira dantzan egitera. A. ARANBURU